



ՀԱՅ ՀԱՏՈՒԿ
ՂԱՍԵՆԹԱՑՆԵՐԻ ԲԱԺՆԻ
«ԳՈՐԴՅԱՆ ՀԱՆԳՈՒՅՅ»
ԾՐԱԳՐԻ ՏԵՂԵԿԱԳԻՐ

16-րդ դեկտեմբերի, 1999 թ. Թիվ 4

ՀՈԳԵՎՈՐԻ ԴԵՐԸ ՀԱՍԱՐԱԿԱԿԱՆ ՀԱՐԱԲԵՐՈՒԹՅՈՒՆՆԵՐՈՒՄ

Քննարկումը չընթացավ հոգևորի՝ որպես գուտ կրոնական սկզբունքի դիտարկումով: Քննության առնվեց ընդհանրական հոգևոր կառույցը՝ որպես ոչ նյութական արժեքների համակարգ, խոսակցությունն ընթացավ ներկա իրավիճակում Հայաստանի և հայ ազգի համար հոգևոր արժեքների դերի ու նշանակության շուրջ:

Ըստ Լևոն Սկրտչյանի, այն գործընթացները, որոնցում հայտնվել է Հայաստանն արցախյան շարժումից մինչև անկախության սկիզբն ու պետականության կառուցումը, ուղեկցվում են իդեալների, գաղափարախոսությունների, սկզբունքների, հոգևոր կյանքի լուրջ փոփոխություններով, երբ ջարդվում են որոշակի կաղապարներ, կենցաղը, կենցաղային արժեքային համակարգը: Այդպիսի շրջադարձերից հետո հասարակությունը փորձում է կամ իր ավանդական արժեքների հիմքի վրա ձևավորել նորը կամ ընդօրինակման միջոցով ամբողջացնել այն արժեքահամակարգը, որով պիտի ընթանա առաջ: Դրված է բարդ խնդիր. Հայաստանում հայրենիքի մի փոքրիկ հատվածում, ուր ապրում է հայության ոչ ավել 40%-ը, ձևավորել անկախ պետականություն, միաժամանակ արտահայտելով ամբողջական մի ազգի նպատակներ, որը սփռված է աշխարհում և որի հատվածները տարբեր պայմաններում փորձում են պահպանել իրենց արժեքները: Այս պարագայում վճռական է դառնում ոչ նյութականը՝ բարոյական այն համակարգը, որը հնարավորություն պետք է տա կողմնորոշվելու առկա խայտաբղետ հարաբերություններում:

«Այսօր հայության հոգևոր կառույցի մեջ չամբողջացված տեղեր կան, հստակ է, թե ինչ հիմքերի վրա պետք է այն հենվի»:

Լևոն Սկրտչյանի կարծիքով, 21-րդ դարը բոլորովին այլ պահանջներ է ներկայացնելու, և բավարար չի լինելու միայն անցյալի արժեքներով առաջ գնալը: Նախ հարկավոր է մի քանի հարցադրումների պատասխանները գտնել: Համանման իրավիճակներում մի շարք ժողովուրդներ փորձել են իրենց արժեքային համակարգը ձևավորել շարունակականության տեսության հիման վրա, որն իր մեջ ներառում է զարգացման մեծ աստիճան: Մինչդեռ հայերի բառապաշարում գերիշխողը «ազգապահպանում», «գոյատևում», «ինքնապաշտպանություն» և նման բառերն են, և քիչ տեղ ունի զարգացումը: Հայության էներգիան, իբրև ծանր արհավիրքներ տեսած ժողովուրդ, հիմնականում կենտրոնացած է պահպանիչ բնազդների վրա: Սրանով պայմանավորված սփյուռքահայերի հոգեբանության մեջ մեծ տեղ ունի համայնքային, ամփոփվելու տրամաբանությունը, հայաստանցիներին բնորոշ է անկլավային մտածողությունը:

(Հարունակությունը 2-րդ էջում)

*«Գորդյան հանգույց»
ծրագրի հերթական
քննարկմանը
մասնակցում էին*

*ԳՂՂ վարչապետի խորհրդակա-
ն, կրոնի գործերով
խորհրդի նախագահի
պաշտոնակատար
Լևոն Սկրտչյանը*

*ԵՊՂ աստվածաբանության
ֆակուլտետի դեկան
Շահե արքեպիսկոպոս
Աճեմյանը*

*ԵՊՂ սոցիոլոգիայի
ամբիոնի վարիչ, պրոֆեսոր
Լյուդմիլա Հարությունյանը:*

*«Գորդյան հանգույց» ծրագրի
տեղեկագիր
Հայաստանի ամերիկյան
համալսարան
Հատուկ դասընթացների բաժին
URL:// www.aua.am/a/a/extends/lectures*

*Ծրագրի համակարգող
Հրայր Չորյան*

*Հայաստանի ամերիկյան
համալսարան
ՀՀ, ք. Երևան, Բաղրամյան 40
հեռ. 27-16-58*

Հասցեատեղ

Բնորոշ է նաև այն, որ շուրջ 70 տարի ունենալով հայկական օջախ, այսուհանդերձ չի ձևավորվել ազգային հստակ գաղափարախոսություն: Միասնական պետությունում իշխող մեկ գաղափարախոսությունը որոշակիորեն վանել է այն հոգևոր, ավանդական արժեքները, որոնք բնորոշ են ինքնուրույն գարգացող ժողովուրդներին: Դրանցից մեծագույնը պարոն Մկրտչյանը համարեց ազգային-կրոնական գաղափարախոսությունը, որը հայերն ունեցել են աշխարհում առաջիններից մեկը, որը, սակայն, վերջին տասնամյակների ընթացքում հասարակական տրամաբանության մեջ իր տեղը զիջել է:

Լևոն Մկրտչյանի կարծիքով հոգևոր հաջորդ խնդիրն այն է, որ չի հաջողվել հարաբերակցել Հայաստանի հասարակության և հայրենիքից դուրս գտնվող խմբերի խնդիրները, ընդհանուր հայտարարի գալ, որոշել առաջնահերթությունները: Ըստ նրա, հարկ է կատարել համազգային գույքագրում՝ երեք հարթություններով, որից առաջինը բարոյականն է: Յուրաքանչյուր ժողովուրդ պետք է ունենա իր բարոյական այցեքարտը: Պարզ ասած, յուրաքանչյուր հայ պետք է կարողանա հակիրճ և հստակ ձևակերպել, թե ինքն ի՞նչ քաղաքակրթության կրողն է, ի՞նչ տեղ ունի աշխարհում և ի՞նչ է տվել աշխարհին: Հայերը դա չեն ձևակերպել, ուստի հարկ է նախ և առաջ բարոյական գույքագրում կատարել: Այնուհետև առաջարկվում է ֆիզիկական և նյութական գույքագրումներից հետո ի մի բերել եղած ներուժը, ապա միայն դնել ընդհանուր նպատակներ, հստակեցնել դրանց հասնելու ուղիները:

Ըստ Շահե արքեպիսկոպոս Աճեմյանի, այսօր հայության հոգևոր կառույցի մեջ չամբողջացված տեղեր կան, հստակ չէ, թե ինչ հիմքերի վրա պետք է այն հենվի: «Ազգային-կրոնական», «բարոյագիտություն», «համամարդկային արժեքներ» հասկացությունները նա որակեց որպես շատ ընդհանուր, և եթե դրանց տեսանկյունով նայում ենք իրավիճակին, ապա այն տագնապահարույց է:

Նրա խոսքերով, երբ խոսվում է հոգևոր կառույցի մասին, նախ և առաջ պետք է նկատի ունենալ այդ կառույցի հանդեպ եղած հավատքը: Հայության ազգային հավատքը շատ պարզ է ու հստակ, այն ունի 2000 տարվա ավանդույթ, ու թեև այսօր այն նույն ձևով չի արտահայտվում, այլ ոճով է հանդես գալիս, սակայն հիմքը նույնն է՝ քրիստոնեական ըմբռնումը:

Շահե արքեպիսկոպոսի գնահատմամբ, այսօրվա Հայաստանի հոգևոր կառույցի վերականգնման համար առաջին քայլը պետք է լինի պարզելը, թե իրականում հասարակությունն ինչին է հավատում: Արդյո՞ք կա այն հավատը, որ եղած տկար վիճակով հնարավոր է լինելու հայրենիք ստեղծել բառի ամենալայն իմաստով:

Կարծիք հայտնվեց, որ ազգային գաղափարախոսության հիմնական բաղադրիչներից պետք է լինի հողի սրբությունը: Հայը պետք է հասկանա, թե որն է իր կապը հայրենի հողի հետ, որից հետո կգիտակցի, այդ հողը պաշտպանելու իր պարտականությունը:

Որպես հաջորդ կարևոր բաղադրիչ Շահե Աճեմյանը նշեց ընտանիքի սրբությունը: Այս դրսևորումը հայերի մեջ միշտ էլ խիստ արտահայտված է եղել, թեև վերջին շրջանում խաթարվել է նաև հայ ընտանիքի հիմքը: Մինչդեռ սա այն օղակն է, ուր մարդը մանուկ հասակից ստանում է իր հոգևոր սնունդը, ազգային զգացումը, արժեքային համակարգը:

Խնդրո առարկայի սոցիալական տեսանկյունը ներկայացրեց Լյուդմիլա Հարությունյանը: Գնահատելով հոգևորի դերը ներկա հասարակական հարաբերություններում, նա նշեց, որ թեև առկա են բազմաթիվ մտահոգիչ խնդիրներ, այսուհանդերձ իրավիճակը փակուղային չէ: Ըստ նրա, ներկա ժամանակաշրջանում նյութականի դերը դարձել է ահռելի և սխալ է կարծել, թե հոգևոր խնդիրների լուծումը կհանգեցնի հասարակության առողջացմանը: Միաժամանակ նա հույս հայտնեց, որ մարդու, ազգի, պետության կյանքում հոգևորի դերը շատ մեծ է, և հիմնախնդիրների լուծումները կգան հոգևորի հետ:

Տիկին Հարությունյանն ազգի գոյատևումն ու զարգացումը նախ և առաջ կապեց ազգային գաղափարախոսության մշակման հետ: Նրա կարծիքով, ազգային գաղափարը ընդհանրապես մոռացված է: Սա այն դեպքում, երբ աշխարհը հարգում է այն պետություններին, որոնք ունեն կուռ ազգային գաղափարախոսություն, որը ներառում է պետության դերը, մշակակությունը, նպատակները:

Հայությունն ունի պատմական որոշակի հոգևոր հարստություն, որն այսօր էլ շարունակում է ապրեցնել ու առաջնորդել ազգին: Որքանո՞վ է պատմականորեն ձևավորված այս հարստությունը օգնում կամ նպաստում առաջընթացին: Ըստ Լյուդմիլա Հարությունյանի, պատմական շատ դրվագների արժեքը հայությունը դեռ ինքն իր համար էլ չի պարզել: Դրանք թվում են նշեց Եղեռնը, որակելով այն որպես ամենահզոր հոգևոր հարստություն, որը, սակայն, ռացիոնալիզացիայի, ժամանակակից դարձնելու խնդիր ունի:

Ըստ ԵՊՀ սոցիոլոգիայի ամբիոնի վարիչի, մեր երկիրը չի կարողանում օգտագործել ընտրությունները: Նրա գնահատմամբ, այսօր չի տրված այն հարցի պատասխանը, թե ո՞ր քաղաքակրթությունն ենք մենք ընտրում: Հայաստանը չի արել նաև իր աշխարհաքաղաքական, ինչպես նաև գաղափարախոսական ընտրությունը:

Տիկին Հարությունյանի կարծիքով Հայաստանում պակասում են հոգևորով, գաղափարներով, գաղափարախոսությամբ զբաղվող լուրջ մարմիններն ու հասարակության այն խմբերը, որոնք կմտահոգվեն այս հարցերի շուրջ: «Հայերը հետ նայելով, պետք է գնան առաջ», այսպիսի ընդհանրացման է հանգեցրել սոցիոլոգիական հարցումներից մեկի ամփոփումը: Սակայն, ըստ Լյուդմիլա Հարությունյանի, այդ բանաձևի բանալին դեռևս գտնված չէ:

Յնչեց այն ընդհանրական կարծիքը, որ բարձրացված հարցերն անհնար է լուծել մի քանի տարվա ընթացքում, առավել ևս ինչ-որ մարդկանց խմբով կամ դեկավարների կամքով: Կպահանջվի երկարատև, միասնական աշխատանք: Կարևորվեցին հասարակական հարաբերություններում հոգևորի դերի մասին քննարկումները, քանի որ, ըստ Լևոն Մկրտչյանի, այդ նյութի պարզաբանմամբ է հնարավոր հասնել այն հստակ հայեցակարգի մշակմանը, որը կոչվում է ազգային անվտանգության ամբողջական հայեցակարգ: Այդ ճանապարհով է կարելի ունենալ ուրույն ձեռագիր այն ամբողջության մեջ, որը կոչվում է համաշխարհային քաղաքակրթություն:

«Հայության էներգիան, իբրև ծանր արհավիրքներ տեսած ժողովուրդ, հիմնականում կենտրոնացած է պահպանուիչ բնազդների վրա»: